

五禮通考

第十一
卷

五禮通考卷第二百四十

內廷供奉禮部右侍郎龔震龍編輯

翰林院侍讀學士嘉定王鳴盛

李太僕鑑臺蘇都御史桐城方觀承同訂

直隸按察司副使元和宋宗

參校

軍禮八

校閱

蕙田案古者寓兵於農有校閱之禮有田獵之禮考周禮大田之禮簡眾也又云聽師田以簡稽春而振旅夏而芟舍秋而治兵冬而大閱非徒以饁禽取獸供賓客宗廟之用而已蓋安不忘危講武之儀卽寓於游田之內故校閱卽田獵田獵卽校閱二者不可分也然觀月令講武飭事之文則其事亦有不爲田獵者卽康成注亦未嘗與冬狩混而爲一

也至春秋一經所書大閱治兵之事尤多蓋
列國多故臨戰而習武以是爲權禮焉漢唐
以下其事益分古今異宜無容泥古也今分
爲二門而於大司馬四時之狩悉歸之田獵
云

春秋莊公八年公羊傳祠兵者何出曰祠兵入曰振旅
其禮一也皆習戰也

國語周語三時務農而一時講武故征則有威守則有
財

蕙田案以上總論

禮記月令孟冬之月天子乃命將帥講武習射御角力

注爲簡習之亦因
營室主武士也

仲冬之月飭死事

注飭軍士戰必有死志 疏因殺氣之盛以
飭軍士使戰者必有死志故曰飭死事也

蕙田案以上王畿校閱之禮

春秋桓公六年秋八月壬午大閱

杜注齊爲大國以戎事徵諸侯之成嘉美鄭忽而忽欲以有功

爲班首怒而訴齊人魯人懼之故以非時簡車馬 疏公狩于郎公狩于禚皆書公大蒐大閱不書公者周禮雖四時教戰而遂以田獵但蒐閱車馬未必皆因田獵田獵從禽未必皆閱車馬何則怠慢之主外作禽荒豈待教戰方始獵也公及齊人狩于禚乃與鄰國共獵必非自教民戰以矢魚于棠非教戰之事主爲游戲而斥言公則狩于郎禚亦主爲游戲故特書公也大蒐大閱國家之常禮公身雖在非爲游戲如此之類例不書公定十四年大蒐于比蒲邾子來會公公身在蒐而經不書公知其法所不書以其國家大事非公私欲故也且比蒲昌間皆舉蒐地此不言地者蓋在國簡閱未必出獵昭十八年鄭人簡兵大蒐在干城內此亦當在城內

至氏傳秋大閱簡車馬也

公羊傳大閱者何簡

車徒也何以書蓋以罕書也

注大簡閱兵車使可任用而習之也比年簡徒謂之蒐三年簡車謂之大閱五

年大蒐車徒謂之大蒐

穀梁傳大閱者何閱兵車也修教明諭國以

道也平而修戎事非正也

注因四時田獵以習用戎事平謂不因田獵無事而修之

蕙田案杜預以大閱爲因事習武何休以大

閱爲五年定制二說不同然皆以爲與田獵

異事書之於策非有所譏也觀孔氏正義自

明乃穀梁以為非正范甯以不因田獵貶之
恐非經意

莊公八年春王正月師次于郎以俟陳人蔡人甲午治

兵

莊注治兵于廟習號令將以圍郕

疏周禮仲春教振旅仲秋教治兵穀梁云

出曰治兵習戰也入曰振旅習戰也釋天云出為治兵向威武也入為振旅定尊卑也孫炎云出則幼賤在前貴勇力也入則尊老在前復常法也彼言治兵振旅皆謂因田獵而選車徒教戰法習號令知此治兵亦是習號令此治兵于廟欲就尊嚴之處使之畏威用命耳但軍旅之眾非廟內所容止應告于宗廟出在門巷習之昭十八年傳稱鄭人簡兵大蒐將為蒐除注云治兵于廟城內地迫故除廣之是告于廟習于巷也下有圍郕知治兵為圍郕也沈云周禮中秋治兵月令孟春云是月也不可以稱兵稱兵必天殃所以甲午治兵者以為圍郕故非時治兵猶如備難而城雖非時不譏沈又云治兵之禮必須告廟告廟雖是內事治兵乃是外事故雖告廟仍用甲午且治兵則征伐之類又為圍郕雖在郊內亦用剛

日甲午治兵公羊以為治兵殺牲饗士卒

穀梁傳出曰治兵習戰也入曰振旅習

戰也治兵而陳蔡不至矣

莊師次于郎以俟陳人蔡人

兵事以嚴終故曰

善陳者不戰此之謂也善為國者不師

莊道德齊禮鄰國望之歡如親戚何師之為

善師者不陣

莊師眾素嚴不須耀兵列陣

善陣者不戰

莊軍陣嚴整敵望而畏之莫敢與戰

善戰

者不死

莊投兵勝地故無死者

善死者不亡

莊民盡其命無奔背散亡

蕙田案以上魯校閱之禮

國語齊語管仲作內政而寄軍令制三軍有中軍之鼓有國子之鼓有高子之鼓春以振旅秋以治兵是故卒伍整于里軍旅整于郊

蕙田案以上齊校閱之禮

春秋昭公十四年左氏傳夏楚子使然丹簡上國之兵于宗邱且撫其民分貧振窮長孤幼養老疾收介特救災患宥孤寡赦罪戾詰奸慝舉淹滯禮新敘舊祿勳合

親任良物官

注上國在國都之西西方居上流故謂之上國宗邱楚地特單身民收聚不使流散物事也疏周禮司兵掌五兵鄭眾云五

兵者戈及戟矛夷矛鄭元云步卒之五兵則無夷矛而有弓矢然則兵者戰器之名戰必令人執兵因即名人爲兵也此簡上國之兵謂簡料人丁之強弱于宗邱之地集而簡之使屈罷簡東國之兵于召陵亦如之

注兵在國都之東者好

于邊疆息民五年而後用師禮也

蕙田案以上楚校閱之禮

僖公二十七年左氏傳楚子將圍宋使子文治兵于睢

注子文時不爲令尹故云使治兵習號令也睢楚邑也

終朝而畢不戮一人

注終朝自旦及食時也子文欲委重于子玉故

略其事

子玉復治兵于蔿

注子玉爲令尹故蔿楚邑

終日而畢鞭七人貫三人

耳國老皆賀子文子文飲之酒

注賀子玉堪其事

蔿賈尙幼後至

不賀子文問之對曰不知所賀子之傳政于子玉曰以

靖國也靖諸內而敗諸外所獲幾何子玉之敗子之舉

也舉以敗國將何賀焉子玉剛而無禮不可以治民過

三百乘其不能以入矣苟入而賀何後之有

注三百乘二萬二千五百人言

子玉力小任重將不能以入其眾而治之也苟子玉能入其眾而舉賀典未爲後時而失禮言不勝其任不足賀

蕙田案以上校閱失禮之事

右校閱

通典漢興設南北軍之備外命天下郡國選能引強蹶張材力武猛者以爲輕軍騎士材官樓舡常以立秋後

郊禮畢斬牲於東門以薦陵廟肆孫吳兵法六十四陣
每十月都試金革騎士各有員數

蕙田案劉昭注續漢志引魏書漢承秦制十月會五營士爲八乘進退名曰乘之晉志亦曰都講

續漢禮儀志漢儀立秋之日自郊禮畢始揚威武斬牲
於郊東門以薦陵廟乘輿御戎輅白馬朱鬣躬執弩射
牲牲以鹿麋太宰命謁者各一人載以獲車馳送陵廟
還宮遣使者齎束帛以賜武官武官肆兵習戰陣之儀
斬牲之禮名曰貊劉兵官皆肆孫吳兵法六十四陣名
曰乘之

晉書禮志既還公卿以下陳雒陽街乘輿到公卿以下
拜天子下車公卿親識顏色然後還宮

漢書文帝本紀十四年冬匈奴寇邊殺北地都尉卬遣
三將軍軍隴西北地上郡中尉周舍爲衛將軍郎中令
張武爲車騎將軍軍渭北車千乘騎卒十萬人上親勞
軍勒兵申教令賜吏卒

武帝本紀元封元年冬十月詔曰南越東甌咸伏其辜
西蠻北裔頗未輯睦朕將巡邊陲擇兵振旅躬秉武節
置十二部將軍親帥師焉行自雲陽北厯上郡西河五
原出長城北登單于臺至朔方臨北河勒兵十八萬騎
旌旗徑千餘里

郊祀志冬上議曰古者先振兵釋旅然後封禪遂北巡
朔方勒兵十餘萬騎還祭黃帝冢橋山釋兵涼如

注李奇曰涼如

地名

後漢書世祖本紀建武六年初罷郡國都尉官

劉氏攷曰郡有都尉國有中尉
此時罷郡都尉耳不應有國字

章如愚曰光武見翟義反隗囂叛皆以秋試勒車騎
誅守長以起事也是以罷郡國都尉無都試之法惟
京師肄兵如故

順帝本紀永建元年夏五月嚴飭障塞繕設屯備立秋
之後簡習戎馬冬十月庚寅遣黎陽營兵出屯中山北
界告幽州刺史令緣邊增置步兵列屯塞下調五營弩
師郡舉五人令教習戰射

注調選也五營五校也謂長水
步兵射聲胡騎車騎五校尉

何進傳靈帝中平五年天下滋亂望氣者以爲京師當
有大兵兩宮流血大將軍司馬許涼假司馬伍宏說進
曰太公六韜有天子將兵事可以威厭四方進以爲然
入言之於帝於是乃詔進大發四方兵講武於平樂觀
下起大壇上建十二重五采華蓋高十丈壇東北爲小

壇復建九重華蓋高九丈列步兵騎士數萬人結營爲
陳天子親出臨軍駐大華蓋下進駐小華蓋下禮畢帝
躬擐甲介馬稱無上將軍行陳三匝而還詔使進悉領
兵屯於觀下是時置西園八校尉以小黃門蹇碩爲上
軍校尉虎賁中郎將袁紹爲中軍校尉屯騎都尉鮑鴻
爲下軍校尉議郎曹操爲典軍校尉趙融爲助軍校尉
淳于瓊爲佐軍校尉又有左右校尉帝以蹇碩壯健而
有武略特親任之以爲元帥督司隸校尉以下雖大將
軍亦領屬焉

魏志武帝本紀建安十三年春正月作元武池以肄舟
師

晉書禮志獻帝建安二十一年魏國有司奏古四時講
武皆於農隙漢西京承秦制三時不講惟十月都試今

金革未偃士眾素習可無四時講武但以立秋擇吉日
大朝車騎號曰治兵上合禮名下承漢制奏可是秋閱
兵魏王親執金鼓以令進退

右漢

晉書禮志延康元年魏文帝爲魏王是年六月立秋治
兵于東郊公卿相儀王御華蓋親令金鼓之節
魏志文帝本紀黃初六年十月行幸廣陵故城臨江觀
兵

明帝本紀太和元年冬十月丙寅治兵於東郊

蜀志後主建興十年亮休士勸農於黃沙作流馬木牛
畢教兵講武

右三國

晉書武帝本紀咸甯元年十一月癸亥大閱於宣武觀

三年十一月丙戌帝臨宣武觀大閱

太康四年十二月庚午大閱於宣武觀 六年十二月

甲申大閱於宣武觀旬日而罷

禮志元帝太興四年詔左右衛及諸營教習依大習儀作鴈羽仗

成帝本紀咸和元年十一月壬子大閱於南郊

文獻通考咸甯元年太康四年六年皆大閱習眾然不自令進退自惠帝以後其禮遂廢成帝咸和中詔內外諸軍戲兵於南郊之場故其地因名鬪場自後蕃鎮桓庾諸方伯往往閱習朝廷無事焉

右晉

宋書文帝本紀元嘉二十年二月甲寅車駕於白下閱武 二十五年春正月庚寅詔曰安不忘虞經世之所

同治兵教戰有國之恆典故服訓明恥然後少長知禁
頃戎政雖修而號令未審今宣武場始成便可刻日大
習眾軍當因校獵肄武講事

孝武帝本紀孝建二年九月丁亥車駕於宣武場閱武
大明五年二月癸巳車駕閱武詔曰昔人稱人道何先
于兵爲首雖淹紀勿用忘之必危朕以聽覽餘閒因時
講事坐作有儀進退無爽軍幢以下普量班錫 七年
春正月癸未詔曰春蒐之禮著自周令講事之語書於
魯史所以昭宣德度示民軌則今歲稔氣榮中外甯晏
當因農隙葺是舊章可剋日於元武湖大閱水師并巡
江右講武校獵十一月癸巳車駕習水軍於梁山
南齊書武帝本紀永明二年八月戊申車駕幸元武湖
講武 四年閏月戊午車駕幸宣武堂詔曰今親閱六

師少長有禮領馭郡帥可量班賜 九年九月戊辰車
駕幸琅邪城講武觀者傾都普頒酒肉

陳書後主本紀至德四年秋九月甲午車駕幸元武湖
肄鱸艦閱武宴羣臣賦詩

魏書昭成帝本紀建國五年秋七月七日諸部畢集設
壇埒講武馳射因以爲常

道武帝本紀登國六年秋七月壬申講武於牛川 八
年秋七月車駕臨幸新壇庚寅宴羣臣仍講武 十年
八月帝親治兵於河南

皇始元年八月庚寅治兵於東郊

天興二年秋七月辛酉大閱於鹿苑享賜各有差 五
年春正月帝聞姚興將寇邊庚寅大簡輿徒詔并州諸
軍積穀於平陽之乾壁六月治兵於東郊部分眾軍

明元帝本紀永興二年秋七月丁巳立馬射臺於陂西
仍講武教戰 五年春正月己巳大閱畿內男子十二
以上悉集己卯幸西宮類拔大渠帥四十餘人詣闕奉
貢賜以縉帛錦罽各有差乙酉詔諸州六十戶出戎馬
一匹庚寅大閱於東郊部署將帥以山陽侯奚斤爲前
軍眾三萬陽平王熙等十二將各萬騎帝臨白登躬自
校覽焉二月戊申賜陽平王熙及諸王 侯將士布帛
各有差庚戌幸高柳川甲寅車駕還宮
太武帝本紀始光元年九月大簡輿徒治兵於東郊部
分諸軍五萬騎 二年冬十月治兵於西郊 四年夏
四月治兵講武

延和元年夏五月大簡輿徒於南郊

太平眞君九年九月乙酉治兵於西郊 十一年八月

癸未治兵於西郊

文成帝本紀興安二年九月壬子閱武於南郊

冊府元龜太安四年七月壬子詔曰朕每歲以秋月閒日命羣官講武平壤所幸之處必立宮壇糜費之功勞損非一宜仍舊貫何必改作也

文獻通考孝成帝和平三年因歲除大讎遂耀兵示武更爲制令步兵陳於南騎士陳於北各擊鐘鼓以爲節度其步兵所衣青赤黑黃別爲部隊楯稍矛戟相次周迴轉易以相赴就有飛龍騰蛇之變爲函箱魚鱗四門之陣凡十餘法跪起前却莫不應節陣畢南北二軍皆鳴鼓角衆盡大譟各令騎將六千人去來挑戰步兵更進退以相拒擊南敗北捷以爲威觀自後以爲常

魏書孝文帝本紀延興四年八月戊申大閱於北郊